

Segun famia di fayecido:

ARUBIANO CU A FAYECE DEN PRISON NA HULANDA A WORDE MATA

ORANJESTAD (AAN): Fayecimento di e Arubiano Douglas Dawson Telston Curiel kende tabata deteni den un prison na Rotterdam Hulanda, a lanta masha hopi stof tanto na Aruba como na Hulanda.

A sali publica den diferente corant na Hulanda cu e morto di Ted Curiel no tabata un morto natural manera cu autoridadnan Hulandes tabata pretende.

Autopsia cu a wortde haci riba e curpa di Ted a muestra bon cla cu Ted no a muri un morto natural.

Tur cos ta muestra cu Ted a worde choca y esaki mester a conduci na su morto.

Ta masha straño mes cu autoridadnan no a actua mesora ora cu nan a bin haya sa cu Ted no a muri un morto natural y cu ta despues cu señora di Ted a bay den publicidad na Hulanda cu nan a

dicidi di actua.

Informacionnan cu DIARIO a haya di Hulanda ta bisa, cu Rijksrecherche ta haciendo un investigacion y cu aparentemente 4 pa 5 bewaker ta worde sospecha di hunto cu un detenido di a choca Ted, pero te awe no tin un confirmacion oficial ainda di parti di autoridadnan Hulandes.

Ted tabata den prison na Rotterdam despues di tabata pa mas cu 5 luna caba den Voorarrest pa sospecho di maltrato, pero segun famia di Ted e detencion di Ted no tabata hola bon.

Ta di con nan a tene Ted pa mas cu 5 luna den Voorarrest siendo cu Ted a apela su caso, pero asina mes nan no kier a laga Ted sali di Prison.

Ta masha straño mes autoridadnan tabata keda para riba cu Ted mester a keda den prison te ora cu su caso por a worde trata den Hoogberoep.

Segun famia di Ted, autoridadnan na Hulanda tabata manda Ted di un prison pa otro den tur skina di e pais.

Casa di Ted mester a viaha cada biaha den trein pa oranan largo pa e por a bay den tur skinanan di Hulanda, pa asina su yiunan por a wak nan tata.

Ultimo nan tabata tin Ted deteni na Rotterdam caminda na un forma masha misterioso el a bin na fayese.

Ta cada biaha Fiscal tabata prolonga Ted su detencion cu 30 dia, ni cuanto cu e famia tabata pidi pa nan laga Ted bay te ora cu su caso bin pa dilanti den Hoogberoep.

Casa di Ted tin un negoshi chiquito na Hulanda y mientrastanto cu Ted tabata sera, e mester a pasa den duro pa e por a maneha e negoshi y ta cada biaha e abogado di Ted tabata muestra fiscalnan riba e hecho, cu negoshi di e famia tabata worde perhudica door di Ted su detencion.

Rijksrecherche cu a cuminsa haci un investigacion ta blo teyma cu e famia, si Ted no tabata tin un o otro malesa den pasado y tur cos ta muestra den e direccion cu nan ta trata di tapa henter e caso.

Un detenido cu ta den

prison y su caso no a keda cla ainda pasobra e caso a bay den Hoogberoep y ta bin ta fayese na un forma masha misterioso, ta un berguensa grandi pa autoridadnan Hulandes.

Segun famia di Ted nan a laga e famia sa, cu Ted a stik den su mesun scupi y ta di unda nan a saca e conclusion aki, si autopsia mes ta bisa cu Ted mester a muri door di un accident?

Kico nan kiermen cu un accident pasobra garganta y nek di Ted tabata hopi hinca, cu e yiunan mes durante intiero a bisa cu no ta nan tata ta drumi den caha di morto, pasobra Ted su garganta tabata asina hinca cu e yiunan no por a reconose nan tata.

DIARIO a haya confirmacion oficial cu Ted no a muri door cu el a stik den su scupi, manera cu autoridadnan a trata di tapa e caso.

Informacionnan cu DIARIO a haya di informantenan na Hulanda, ta bisa cu Ted tabata papia cu su señora na telefoon ora cu un otro detenido a cuminsa busca pleito cu Ted y despues e comunicacion di telefoon a worde kibra.

Aparentemente Ted a worde wanta door di 4 pa 5 Bewaker y un detenido y den Handboei nan mester a craga Ted hibe pa un cel.

Un persona cu ta geboei no mester worde carga pa su cel door di 4 pa 5 bewaker y ta di unda nan ta bin saca cu Ted a stik den su mesun scupi si Ted no tabata tin problema cu respiracion o cu e tabata un patient asmatico!

Segun familiaman, nan por a nota bon cla cu Ted su cara tabata hinca y cu e mester a worde golpia prome cu el a muri.

Ted tabata tin net 1 siman sera den prison na

Noordsingel na Rotterdam, despues cu nan a caba di mande di un skina di e pais pa otro y diripiente e casa di Ted mester a bin tende cu Ted a muri un morto natural.

Hulanda ta un di e paisnan na mundo cu ta grita mas duro cu cualkier otro, cu na otro paisnan maltrato den prison ta tuma lugar contra tur sorto di reglanan internacional y awor na Hulanda mes un caso di maltrato y matamento den prison ta worde saca den publicidad.

Ta cuanto hende mas a muri den prison na Hulanda o a worde maltrata y casonan asina a worde hinca den e famoso Doofpot Hulandes?

Un Arubiano a bin ta fayese den prison na Hulanda na un forma masha straño y sospechoso mes y esaki ta cay bao di responsabilidad di gobierno Hulandes.

Famia di Ted ta lantando un caso contra Estado Hulandes pa asina saca afor kico a pasa y pa persigi esnan cu a maltrata Ted y te hasta pone un fin na su bida. Arubahuis mester cay den e caso aki y exige di gobierno Hulandes claridad den e asunto y trata di evita cu e caso bay den Doofpot.

No por ta asina cu Hulanda cu a yega di bin Aruba y Antiya pa investiga wardanan di polis mescos cu prisonnan y bisa cu na Aruba y Antiya autoridadnan no ta cumpli cu reglanan internacional y awor den nan mesun prison un Arubiano ta fayese na un forma masha misterioso y nan ta trata di tapa e asunto.

E caso di Ted lo bay haya un rabo formal cu lo bay pone autoridadnan na Hulanda den un luz negativo.

Ted a laga su señora cu tres yiu atras despues di a muri un morto cruel.


TA BUSCA E SEÑORA CU A TENE CADENA DI ORO

ORANJESTAD (AAN): Durante e Jump-Up na Savaneta tabatin un pelea. En conexion cu esaki, DIARIO a haya e siguiente peticion di señora B. Croes di Kibaima. "Mi ta pidi encarecidamente pa e señora cu a tene

e cadenanen di oro di mi yiu na Jump-Up na Savaneta durante un pelea pa por fabor yamami na telefon 51766."

E ta bisa cu e cadenanen aki ta di dje, y no di su yiu homber.

CONSTRUCCION DI PARKE SHON A. EMAN A CUMINZA



ORANJESTAD (AAN): Informacion cu DIARIO ta dispone di dje ta indica cu Diasabra a cuminsa cu trabao pa enconexon cu construcion di parke Shon A. Eman. Esaki lo bin enfrente di statua Reina Wilhelmina.

Manera ta conoci cu Shon A. Eman tabata un di e Politiconan cu a lucha fuerte pa realisa Status Aparte. E ta un di e pioneronan kende a entrega un peticion na La Reina e tempo ey cu tabata Wilhelmina. E peticion tabata tin firma di mas di 2 mil persona, pa asina duna e lider di AVP aki e sosten

necesario pa inicia e lucha pa libertad.

Tempo cu e peticion aki a worde entrega tabata na año 1948. Pa tal motibo tambe ta entencion cu riba 18 di Maart proximo e develacion lo tuma lugar. Pa e tempo ey lo ta na Aruba e principe herederero Willem Alexander.

Ya caba e compania encargada pa traha riba e proyecto aki a inicia cu e trabaonan cu dentro di poco lo tin cu converti e sitio den un plaza historico na honor di Shon A. Eman.